

# Avertura cun en giast da Berna

Origen Festival Cultural: tor da teater sensom igl Gelgia

DA GION NUTEGN STGIER / ANR

■ Ella ò ena otezza da 30 meters, ena larghezza da 22 meters, vetiers 40 fanestras, cuntigna ena tribuna movibla e porscha plaz a radond 300 visitaders. Chegl è la tor da teater tgi vign construeida per 2,5 milliuns francs sensom igl Pass da Gelgia e duess anfignen igl 2020 esser egn digls lis per las preschentaziuns dallas produziuns dad Origen. Tgi Giovanni Netzer, igl intendant digl Origen Festival Cultural, procura savens per surprasas schi vo per la tschernia digls lis per preschentar las sias produziuns cultrualas agl public, è nign misteri. Gist chel aspect fò Origen anc pi particular, agen ed interessant. En li preferia da Giovanni Netzer è gio dadei igl Pass da Gelgia, noua tgi el vei en mond tgi para dad esser infinit, lò vign el er confronto cun tot las lunas dalla nateira e tant da de scu er la notg para el dad esser aint igl paradìs sensom igl pass cun ena otezza da 2300 meters sur mar. Damai è chel pass er scu fatg per esser la culissa dallas produziuns digl Origen Festival Cultural ed er igl li per integrar la nateira ainten las produziuns e per dar a chellas ena expressiun, tgi dat miانع ainten las pi modernas tgesas da teater digl mond.



Treis persungas tgi creian agl project dalla tor da teater sensom igl Pass da Gelgia. (da san.) Leo Thomann, mastral Surses, Giovanni Netzer, intendant Origen ed Enrico Uffer, impressari da lenna.

FOTO G. N. STGIER

**Nateira e cultura on avigneir**  
Per preschentar igl sies pi nov project alla publicitad è Giovanni Netzer ia a Turitg, e chegl er anc ad ot. Segl 12avel plang dad en bietg cun ena vista magnifica segl martg, on plessas persungas declaro l'importanza digl Origen Festival Cultural, tge tgi la tor da teater sensom igl pass porta e tgi igl cantun Grischun dovra urgent novs impuls per dar agl turissem ed all'economia nova speranza. *Andrea Hämmerle*, igl president dall'Uniu da promoziuin Pro Origen, ò mano la conferenza da medias e detg tgi igl turissem sa revis-

gna ansomma betg er aint igl Grischun e chegl tgi pertotga igls bungs onns cun tschaisins dallas ovras hidraulicas veia igl futur er betg gist or igl pi bagn. Igl avigneir seia da promover la nateira e la cultura per dar agl turissem nov tgatsch, ò punctuo *Andrea Hämmerle*. Ena ferma pitga an chella tgossa seia Origen. L'instituziun culturala procura dad onn tar onn per en svilup economic e turistic e chegl aint igl antier cantun.

**Daple muntada per la cultura**  
A pled è er nia *Köbi Gantenbein*, igl president dalla cumischung da cultura

digl Grischun. La cultura laica dovra sustign, dantant la cultura professionala anc daple. Ansomma duess la cultura survagneir daple muntada an noss cantun, daple peisa ed er daple atenziun.

Origen seia per la cultura grischuna da gronda importanza e la nota per ena cultura professionala dalla classa superioura. Igl project dalla tor sensom igls Pass da Gelgia seia er or dalla vista turistica ena veira valour, ò accentuo *Felix Dietrich*, igl hotelier digl Waldhaus Segl, egn dallas miglras adressas digl antier Grischun e cunzont ena tgesa noua tgi la cultura ò igl madem sta-

tus scu igls giasts, schi betg prest anc daple.

**Resistenta cunter en vent da 270 km h**

Giovanni Netzer collaborescha savens cun architects ed inschigniers da renom. Per la planisaziun dalla tor babilona agl cunfegn tranter Surses e la Nagiadegna è cun *Walter Bieler* vedlonder en inschignier digl rom per construziuns da lenn. Egn dallas sfidas seia bagn da construir uscheia tgi la tor seia resistenta cunter en vent da 270 km h, ò menziuno *Walter Bieler*. *Serge Schmutki*, el segna per l'antiera planisa-

ziun dalla gleisch, ò pero detg tgi da luvrar seia tant scu pussebel cun la gleisch naturala cuagl cler digl de, tgi caschung per ena ambianza fitg atgna e speziala.

**28 000 strubas**

Cun *Enrico Uffer* dalla firma *Uffer SA* a Savognin ò Giovanni Netzer en impressari scu partenari tgi è sez fitg innovativ e tgi ò cun igls sies «Quadrins» gronds success. Pigl project dalla tor da Gelgia è el fi e flomma e sa legra da pudeir construir chella. Per la construziun digls 40 elemaints da lenn dovrigl 900 boras e per francar e fixar igls elemaints dovrigl 28 000 strubas. Productias vignan igls tocs da lenn a Savognin ainten la halla dalla *Uffer SA* e sessor manos sensom igl pass, noua tgi els vignan montos. Igl transport seia bagn ena pulita sfida, ò manega *Enrico Uffer* cun aveir da passar dus stréttgas, egn agls Mulegns e l'otra a Beiva. Igl transport è damai betg simpel, pero er da construir e montar igls elemaints an stgers treis meis è alloura er ena sfida per tots.

**Gratzga ad Origen novas perspectives**

Grond sustign ò Giovanni Netzer per la sia aventura da Gelgia er digl cumegn Surses e digl mastral *Leo Thomann*. Gratzga agl Origen Festival Cultural seia considerablamentg daple veta ainten la val e cunzont a Riom, ò menziuno igl president communal da Surses. Cun la gronda activitad dad Origen veia l'economia ed igl turissem novas perspectives per sa revigneir aglmanc per en pò e cunzont er en product tgi segna per daple tgatsch ainten la regiun ed er ordvart chella, ò manega *Leo Thomann*. L'avertura dalla tor da teater ò li igls 31 da fanadour 2017 e chegl cun en giast prominent. Igl pled d'avertura tigna nign oter tgi *Alain Berset*, igl minister da cultura nazional e cunsiglier federal.

## Santieris èn lis emoziunals

Cumegn Surses: urden da santieris

■ (pb) Essend tgi igls santieris èn dapertot an Surses an possess digls cumegn, è igl nov cumegn er responsabel per igl urden digls santieris. Da curt èn igls possessours dallas fossas nias infurmos an secretg, tgi fossas sur 25 onns vignan allontanadas. En termin per allontanar è er nia do ancunaschaint. Gl'è do reacziuns. Tenor lescha cantunala è igl pòss dalla fossa fixo sen 20 onns. Igl cumegn Surses ò prolungo sen 25 onns. Cura tgi chel termin è spira, vign la fossa schleida se ed allontanada. Chella disposiziun digl cumegn Surses è neida relescheda per tot las fracziuns digl cumegn, cun excepziun da Beiva ed igls Mulegns, tgi èn igl onn proxim er per tutgias da chesta decisiun. Chella maseira è da basigns zont lò, noua tgi igl plaz per las fossas è limito. I dat er fracziuns aint igl cumegn da Surses, tgi on problems da plaz. Chest problem vign pero adegna pi pitschen, essend tgi oz vign ena buna part digls morts ars e l'urna vign savens deponenda ainten la madema fossa cun igl conjugal, cun fardagliuns, genitours etc. Diversas fracziuns on er stgaffia ena fossa communal, noua tgi vign deponia la tschendra e l'inscripziun da ples defuncts.

**Problem: la tgira dalla fossa**

En problem tgi sa dar anc savens an connex cun las fossas è, tgi igls genitours èn

sutteros sen en santieris dallas nossas vischnancas. Igls infants dantant on banduno la val e stattan savens giu la bassa. Mengia da gliunsch per dar regularmaintg alla fossa ena buna tgira e zont bugnier durant igl

taimp da premevaira e stad. E gl'è zont er betg simpel da catar persungas tgi surpiglian la tgira dad ena fossa. Da lascher far sur ena interpresa dad ortulan è er ena dumonda finanziaria. Da lascher la fossa an

en stadi betg cultivo n'è er betg en alternativa. Cun chesta disposiziun da schlier se la fossa siva 25 onns pòss ins è nia en tant ancunter a chellas persungas tgi on fossas, èn pero davent.

**Salouf scu cass spezial**

Cun la disposiziun digl cumegn ins è generalmaintg sto anleget ainten las fracziuns. Reacziuns ègl do a Salouf. A chel aspect ò en votant fatg attent dalla davos radunanza communal.

Tenor la disposiziun niss allontanadas ena gronda part dallas fossas tgi vasagn sen igl maletg sot. Oz è chegl en bel maletg cun crouchs batteidas davant la culissa dalla baselgia ed igl bel clutger roman. I sa tracta da radond 20 fossas. Totas cun ena crouch da fier ainten en crap natural indigen. La fossa scu ala è anromada dad ena reschla da granit d'Andeer. Digl remiment è igl antier santieris, er l'otra vart dalla baselgia vers nord, concepia uscheia. Quasi sainza excepziun stattan crouchs batteidas sensom la fossa ainten en crap natural. E chest bel maletg n'è betg casual, mabagn en concept. En concept tgi ser *Duri Loza* bar-meir ò promovia durant onns e decennis cun blera lavour da persvasiun e tgi è oz en toc cultura dasperas la baselgia. Ed i fiss tuttegna donn, schi chegl gess a perder an curt taimp sainza en mutevi pi evident.

Da vart da suprastanza communal ins ò reagea sen las objeziuns fatgas cun l'ampurmischung, tgi ins vigna a reponderar la tgossa. Scu tgi ins vign a schlier la tgossa cun chels possessours da fossas tgi vottan betg tigneir anavant chella è en'otra dumonda.



Igl santieris a Salouf cò dalla vart cunter sid cun las sias crouchs da fier battia furma ena part dad ena tscherta valeta culturala.

POS